

第十二册

河水七 光緒十一年至十五年

再續行水金鑑



丹德署簽

981.026
1317
12

PDG

再續行水金鑑卷第一百十七

河水編年六十四

光緒十一年正月成孚奏爲遵議裁減黃運河標各營兵額餉需事竊准兵部咨開覆奏總理各國事務衙門奏辦各省節餉練兵摺內聲明河工漕運今昔異宜原設兵額應如何裁減之處一併清查辦理等因奉旨依議欽此欽遵咨行到豫當轉飭所屬黃運各道暨河標中營等確查議減去後茲據先後詳稱豫省黃河上游南北七廳汛地互長險工林立（中略）均未能裁汰等情僉懇具奏前來奴才伏查各該營額設兵丁本難遽議裁減惟值此海防多故籌餉維艱（中略）茲議裁兵節餉仍於無可核減之中嚴飭各道將等力加裁汰（中略）統按百名裁汰五名黃運河標七營共減兵二百四名每年共減餉需銀三千三百餘兩（中略）再黃河險夷無常汛兵既經裁減設伏秋工程緊要不敷調遣應准隨時添募民夫幫同力作事竣仍卽遣散毋稍虛糜庶帑項可節要工亦可鞏固京報

二月初五日陳士杰奏再據總辦河防前臬司潘駿文稟稱增培大隄工需奉戶部議准截留京餉並指撥共銀三十八萬兩按原擬加高幫寬丈尺核計土方本可敷用惟所撥款內有各省河銀八萬兩將來解到多寡殊難預定設有短欠恐本省無款籌墊工程必致棘手莫若先事統籌變通辦理查肥城等十二州縣加幫底寬四尺頂寬一丈加高二尺每丈止增土十方勢難再減其東阿平陰並歷城桃工舊隄原擬頂底均加寬二丈加高二尺收新頂二丈者現擬改爲頂底均加寬一丈五尺加高二

尺收新頂一丈五尺又利津北岸隄身原擬幫底寬三丈頂寬二丈加高二尺收新頂二丈現擬改爲幫底寬二丈頂寬一丈五尺加高二尺收新頂一丈五尺均減寬而不減高仍足禦水如此量爲變通計可核減銀三萬二千餘兩所減加寬各丈尺歸於下次修培時再行辦理於工費稍可節省而防務亦無窒礙等情具詳請示前來臣覆加察核尙屬可行自應准其照辦以免停工待款陳侍郎奏稿

是月二十日陳士杰奏爲堵築李家岸民捻決口業已合龍並陳家林新開一口接辦大概情形事竊臣前因李家岸口門水深溜急堵合爲難當卽力疾赴工親行督率並將大概情形奏明在案臣駐工後飭副將黃金得專司東壩進築事宜調記名提督周禮濂專司西壩進築事宜仍以前河南臬司豫山督率一切天寒凍結鑿冰搶築比至正月二十八九日始將東西護壩各築成四十餘丈大溜挑入正河隨飭星夜將金門占趕築堅固擇於二月初九日合龍初八日四更時分運上二里許之陳家林民捻爲鼉鼉穴空陡陷二十餘丈廬舍尙無損傷臣當分派弁勇馳往搶護仍督率夫役將舊口下占合龍隨壓隨填至十八日始行一律閉氣陳家林一口土旣鬆浮勢又坐灣數日間深至四丈餘其水仍繞由民掘大隄下洩現已搶築六占計尙須十占方能堵合臣疾不能支隨於十九日回省調理所有李家岸善後及陳家林進堵事宜責成在工各員弁妥速辦理該處距省城不遠臣能稍自支持仍當赴工督辦以期迅速藏事山東河工成案 己亥（二月二十九日）得旨李家岸善後事宜卽飭在工各員弁妥速辦理現在將屆桃汛陳家林口岸務須趕緊堵合卽著迅速藏事以衛民生清德宗實錄是月丙申（二十六日）調河南巡撫鹿傳霖爲陝西巡撫陝西巡撫邊寶泉爲河南巡撫清德宗實錄

是月潘駿文議請堵口工程責成承修各員防守稟 竊查定例辦理工程保固限內責在承修保固限外責在防守東省大隄固限一年三年尙未定議卽民埵有無固限亦復未定是現在隄埵之保固承修者要不得辭其責也上年歷城齊東利津齊河東阿五縣先後均有漫決現除利津之甯海已定緩堵東阿各決口已堵臨河多無民埵漫水情形稍緩外其上年所堵歷城之河套圈齊東之蕭家莊目前新堵齊河之李家岸皆在民埵施工堵口工程例應保固河套圈蕭家莊均築於李家岸分洩之際正河水弱故易成功河套圈除料物多由河工局另行發價勇夫多由河防局代爲開支工次仍用銀五千五百兩蕭家莊則工次共用銀四萬二千兩李家岸形勢較難工程稍有波折前後約共用銀二十五萬兩然河套圈蕭家莊兩處工程於正河復故後大汛均形喫重李家岸改築壩身逼河太近丈尺旣非高厚新工猶恐鬆浮必須於此時用大土追壓隨墊加廂務期出水高壩爲抵禦大汛之計防守之責實屬非輕如另行派員而善後未經妥籌大汛難免貽誤在承修者雖未在工作亦不能置身事外然防守者孰肯貿然從事李代桃僵因思縱增防守之人初無減於承修之責曷若卽以承修者防守更覺責任較專查蕭家莊係文令琦承修該令現培齊東大隄應俟隄成後仍令守埵河套圈李家岸皆係汪令麗金承修一人似難兼顧第河套圈內之大隄業已築還李家岸內大隄決口約六七里之遙積水未消淤泥甚厚急切未能還隄是李家岸防守情形尤關緊要應仍責成汪令一手經理使知責無旁貸自必竭力盡心俟三汛安瀾則修守之責均可稍釋於工程可期核實於例意亦屬相符至本局奉委大隄防汛於民埵事宜本可無庸越俎惟埵隄之利害相因而民埵之堵口新工與

大隄之補還缺口其勢尤捷於影響既有所見不敢不據實上陳潘方伯公遺稿

三月初四日陳士杰奏再正在繕摺間差弁賁回臣二月二十日具奏李家岸決口堵合接辦陳家林新開一口情形一摺欽奉批旨覽奏均悉李家岸善後事宜卽飭在工各員弁妥速辦理現在將屆桃汛陳家林口岸務須趕緊堵合卽著督飭迅速蒞事以衛民生欽此臣查李家岸善後工程現已飭令在事各員弁趕緊籌辦計本月望前便可竣事惟陳家林口門據前河南臬司豫山稟稱連日兩壩共進四占口門收窄至十六丈測量水勢已深六丈及六丈二三尺不等寬深牽算受一丈深之水幾及百丈辦理殊爲棘手臣再三思索該處地既坐灣土又鬆浮惟有向前加築護壩挑開溜勢再行搶堵以昭慎重當此庫款支絀之時固當力求撙節不敢稍涉糜費而工程險要亦未敢過於簡省致涉潦草此項工需應請仍在民埵項下動用如有不敷再行隨時奏明提撥臣當謹遵諭旨督飭各員弁晝夜經營以期迅速蒞事陳侍郎奏稿

是月初六日陳士杰奏再上年伏汛期內所決民埵大隄各口如歷城縣之河套圈霍家溜齊東縣之蕭家莊生家寨暨城外東西月隄利津縣之張家灘張家莊甯海莊東阿縣之郎家營齊河縣之李家岸等處均經先後堵合甯海一處酌留口門三十餘丈以備盛漲分洩叠次奏報在案所有堵築大隄決口需用銀兩臣謹遵例與印委各員分成賠修不敢稍涉合混至民埵例無保固所決各口工程以齊河爲最大齊東歷城次之利津又次之臣督率在工各員弁次第堵辦所需經費前請在於奏擬修培民埵項下動用接准工部咨覆如能將兩岸一千三百餘里民埵修築如式方准撥用不得藉詞堵

口致正款不敷等因查民埝工程上年業已修竣大致均尙如式僅歷城南岸加培尙未藏事現已札飭添修惟奉撥經費銀六十三萬八千兩除本省自籌銀三十萬兩外各省關應協之項僅據閩海關解到銀三萬兩江漢關解到銀二萬兩江海關解到銀二萬兩兩淮解到銀一萬兩共計實收三十八萬兩其餘均未解到臣原奏每里津貼銀四百兩不敷幾及一半當經酌量變通改按土方給價藉可稍資節省所有堵口銀兩亦無不力求撙節惟上年齊河歷城齊東利津等處先後民埝決口工程既大需用已繁茲又加陳家林旁決一口水深至六丈有奇辦理亦不易易民埝工需早已用罄各省所欠之款屢催未准解到而工程又難刻緩不得不設法籌辦以濟要需臣思維至再只得將各省關欠解民埝工需銀二十五萬八千兩先行飭藩司陸續籌墊銀十六萬八千兩糧道籌墊銀四萬兩再由臨清關徵存稅銀內墊撥銀五萬兩以資應用統俟各省關解到分別歸還如此暫爲通融藉免要工貽誤山東河工成案

春著惠民縣知縣沈世銓修徒駭隄防議 余承乏茲土將及三年竊見大河之患不在下游而在上游惠民之患不在大河而在徒駭大河自蘭儀決口滾滾而來其勢浩大自入清河隄身逼窄以浩大之勢入逼窄之鄉猝不能受其橫決者勢也始猶以清河之勁疾爲之刷底故十餘年尙無大患今則淤澱愈高大河東下無建瓴之勢其必至橫決者亦理也清河上游南岸多依山麓北岸平衍故決必北出而徒駭實當其衝矣徒駭上游出濟商二縣之間河之南爲路家溝舊有石閘每逢水潦則洩徒駭之水於老海窪其窪東西數十里以之蓄潦水則有餘而黃水之來奔流澎湃瞬息灌滿聒索鎮之

西下及申家橋之東一片汪洋盡成水國其下流仍混入徒駭勢不能容復溢而四出徒駭之南水無所洩其湮沒固不待言其北溢者惠民受之次及陽信次及濱霑幸而大河不決誠如天之福儻橫決不時徒駭之患豈有底乎當隄工甫興府憲奎公卽首勑修築徒駭之議彼時當事者方以長隄爲保障其議遂阻迄今三年乃大受其害蠲賑頻仍歲費鉅萬無補民生豈不哀哉今雖亡羊擬作補牢之舉第惠民殘破之餘民力已竭不能獨任不得不籲大憲藉助鄰封通力合作以圖一勞永逸現擬詳請舉辦未卜能否邀允幸而濟事惠民固首受其福亦非獨惠民受其福也惠民縣志

四月十六日陳十杰奏爲陳家林民埵決口合龍及上年先後各口一律堵築告竣懇恩獎敘以資激勵事竊陳家林決口土鬆溜急辦理維艱臣飭在工各員弁加築護壩挑開溜勢再行進堵業經將大概情形奏明在案近據前河南臬司豫山記名提督周禮濂先後稟稱月來天氣晴和水勢略穩前司等督率在工各員弁星夜進築東西兩面各築成護壩九十餘丈大溜業已挑入正河似可及時合龍等語時臣病已漸次減輕遂於本月初九日親往工次踏看無異當卽飭令趕做金門占隨於十日合龍亥刻閉氣臣一面飭令加修後戩以期穩固並札飭齊河縣知縣王敬勳集夫趕將大隄掘口廂築以備伏秋大汛伏念上年齊東歷城利津齊河東阿各處民埵先後衝決至十餘處之多巨防範不先咎無可辭惟此次工程之大辦理之難經欽差大臣延煦祁世長吳元炳先後查勘其艱鉅情形所共鑒幸督辦豫山及掌壩周禮濂等不辭勞瘁督率有方而在工各員弁亦能體念時艱力求撙節實事求是將河工習氣消除淨盡用能工鉅費省卒告成功該員弁等早暮奔馳於風霜雨雪中者計時

已及七八月之久而又危險疊經實屬異常出力可否由臣擇尤分別保獎以資鼓勵 再據督辦河防前按察使潘駿文稟稱章邱縣傳薪莊百姓因該處民埵被風浪沖刷三月初六日夜聚衆將毛家店大隄掘開數丈洩水東流該前司聞報親往踏看口門刷寬十餘丈溜勢尙覺平緩當卽飭令章邱縣喬有年趕辦料物並派防勇前往及時堵築不意喬有年辦料延緩弁勇至今未能動工現在水勢日漲口門逐漸衝刷寬深辦理較前稍費周章等語查章邱大隄喬有年先事未能預防事後辦料又復遲緩實屬疏懈誤工應請旨將章邱縣知縣喬有年革職仍留本任趕辦料物以贖前愆該處百姓九年曾掘壩河民埵上年又掘羅家莊大隄此次又掘毛家店大隄平時不肯防守外埵臨急恃掘隄爲慣技此風萬不可長應飭喬有年查拏掘隄首犯送案照例懲辦以免他縣效尤轉盼伏汛該處掘口堵塞宜急臣當飭潘駿文嚴催各工員弁勒限於端午前將大隄民埵一律堵合至該處決口水由東趨據齊東鄒平高苑博興等縣先後稟稱自章民掘隄後沿隄居民將小清河隄岸掘開分洩入河餘水向低處漫衍四縣地界各有被淹村莊水深一二尺及數寸不等麥苗不無損傷幸春賑甫經放過暫時稍足謀生而連年被災情形究屬拮据臣一面札飭各縣查明被淹處所分別辦理蠲緩其被災最重戶口當飭江南善士潘民表施則敬等攜帶銀兩分投散放以免流離失所 奉 上諭（四月二十五日准兵部火票遞到軍機大臣字寄二十三日奉 上諭）陳家林決口雖已合龍而毛家店大隄被掘刷寬十餘丈現在水勢日漲口門沖刷寬深亟應趕緊堵築著陳士杰督飭在工各員迅將大隄民埵一律堵合毋稍延緩章邱縣知縣喬有年辦料遲緩革職留任以贖前愆被淹處所卽著查明妥爲撫卹掘隄首

犯並著嚴拏懲辦惟必須查訊明確不得濫及無辜所有有隄各州縣仍責令地方官隨時嚴密防範不准再有疏虞藉口民間私掘以爲諉過地步所請獎勵豫山及在工出力人員之處著俟現決隄埝合龍後併案覈實奏請再行降旨將此由五百里諭令知之山東河工成案

是月甲午(二十六日)諭內閣鹿傳霖奏遵旨陛見請催調任撫臣迅速赴任一摺前有旨令邊寶泉俟鹿傳霖到任後來京陛見鹿傳霖現須交卸起程河南巡撫著孫鳳翔護理清德宗實錄

是月戊午奏再節交夏令黃河兩岸各廳水勢稍有增長河溜上提下坐情形屢有變更疊據南岸上南中河兩廳稟報所轄鄭州中牟各汛大河南圈側注舊險新生形勢喫重均請籌備修守等情前來原擬各廳歲料春工辦竣後即行赴工詣驗遂於四月十八日出省上隄週歷查勘各該廳臨黃工段現在河勢節節圈注未見輕鬆迎溜卑矮各埝先經該管道驗收料物督令擇要分別廂修現俱一律高整惟上南廳鄭下汛十六七堡爲昔年險要之區淤閉多年隄壩久未修治本年桃汛前後對岸忽漲淤灘逼溜逐漸南臥致存灘屢塌至窄處僅存寬二十餘丈仍不時續塌土性既係純沙料物尙未儲備若不預籌防護恐存灘塌盡匯及隄根猝成鉅險辦理益難措手查該工迎溜處所東西順長二百餘丈舊有土壩兩道一在十六堡段內一在十七堡段內兩壩相距較遠且壩身殘缺卑薄挑壯難期得力審度情勢應於十六堡舊土壩上首添築新土壩兩道十七堡舊土壩上首添修新土壩一道并將舊土壩幫培寬厚庶上下氣勢聯絡以爲修守之基惟塌灘迎溜地勢較長原估壩工儻仍不敷挑護尙須隨時添築以免疏虞往返履勘該處情形緊要確係必不可緩之工已飭募集夫車照估尅

期興築一面購運磚石料物以資修辦儻此後河漸外移灘不續塌自應得守且守否則或護磚石或
廂埭段隨時相機酌辦不任稍有虛糜中河廳中牟下汛河勢仍有二三四堡埭灣東注卑矮應加之
埭亦俱一律廂齊堪資抵禦迤下八九堡係舊日牟工金門合龍後改作大隄隄頂原寬二十餘丈歷
經汛漲趨刷陸續匯塌現僅存寬十餘丈而對岸淤灘挺峙河心逼溜直注該段空檔幾成南北頂衝
之勢險要情形尤爲岌岌可危督同道應營汛等詳加履勘一再熟商應於八堡上下首酌拋甓石壩
兩道藉資挑蓋庶免沿隄生工多糜鉅帑現飭趕築壩基速運甓石妥慎拋衛以固要工查驗各廳承
辦正雜各料丈尺飭重尙皆如式敷足長隄另案土工俱經逐段查勘酌發方價催令插斂興工分投
趨築統限大汛以前一律全完不准稍有延誤當此帑項奇絀之際事事皆應節省乃上中兩廳常年
修守之工已極繁鉅茲又復生新險費用倍增查核該廳額領錢糧斷不敷用現惟先儘奉准例添各
款撙節動支力杜浮冒俾昭核實

黃運兩河修防章程

五月初四日陳士杰奏再章邱縣傳薪莊民捻及毛家店大隄決口情形前經臣附片具奏欽奉諭旨
飭令趕緊堵築臣當即遵旨加札嚴催趕辦料物剋期進築去後茲據前臬司潘駿文查視隄捻回省
稟稱大隄堵口需用料物現計祇三成之二而隄之內外兩面皆水取土甚難民捻決口因今年伏汛
較早溜勢已大需用料物尤鉅現值舊料將盡購辦既屬爲難而又處處水阻舟車均難搬運核計料
物一時萬難聚集他處防汛料物又未便移撥轉致顧此失彼查看情形實難急切辦理臣隨於五月
初三日親行前往踏勘其大隄口門雖稍被淘刷而寬深情形尙與前稟不甚懸殊惟取土既難且民

埝未堵隄前積水無從消洩自應先堵民埝則大隄較易爲力而查看民埝形勢瞬息變遷前據章邱縣及在工員弁稟報水深六七尺者約八十丈水深二三尺者僅七八丈現因伏汛已屆除已堵三十餘丈不計外而水深一丈三四尺至二丈餘者尙三十餘丈水深三丈內外者尙二十丈一時物料既難取齊水勢又復日漲一日再四思維非設法挖開大溜無從施工臣當飭在工員弁先作挑水壩三座使溜勢逼入大河則施工較易卽盛漲大至口門亦免衝刷寬深下游地方不至漫溢滋甚其如何設法搶堵之處應俟三壩築成後再行相機辦理臣仍飭潘駿文嚴催藉料不准再事塘塞貽誤工陳侍郎奏稿 辛亥（五月十三日）得旨著卽督飭在工員弁一面趕築挑水壩一面嚴催料物迅堵決口不得託詞遷延致有貽誤清德宗實錄

是月二十九日陳士杰奏爲伏汛盛漲隄埝漫決現在分別籌辦及被水災民籌款撫卹情形事竊前次章邱縣毛家店大隄決口一時難以堵塞臣飭趕築挑水壩挑開溜勢再行搶堵業經奏明在案茲據總辦河防前臬司潘駿文連日稟稱五月初旬章邱縣毛家店挑壩甫成而大汛已至河水陡漲七八尺形如山立澎湃而來頂衝坐灣之處在在喫緊下游歷城章邱交界之埝頭鎮姚莊澹溝青城之楊家莊上游齊河之趙家莊各民埝先後被水沖決口門寬窄不等姚莊澹溝之水直沖毛家店毗連之郭家寨大隄該處地勢本窪經百姓掘挖後兩面皆水無從取土本年此段尙未加培水勢過猛陡然漫過隄頂衝刷數十丈人力難施等語臣當與潘駿文分途親詣查勘隨飭在工員弁集料趕緊堵築其埝頭鎮楊家莊二處民埝各寬三十餘丈旬日內卽行堵合毛家店大隄掘口寬二十餘丈水深

二丈數尺溜尙平緩潘駿文於二十一日赴工設法搶築惟郭家寨口門連日刷寬已近百丈水勢尤急一時暫難施工只好盤住壩頭不使再行衝刷其上游趙家莊民埝刷開約七十餘丈下有格隄攔阻水復逆行至上年大隄掘口處所彼時齊河縣知縣王敬勳修補大隄尙未告竣遂仍由此灌入徒駭河測量水勢比較上年李家岸決口溜勢僅三分之一查徒駭河隄岸臣於去冬今春屢次嚴飭各地方官督夫加培以備無虞計此次決水當可容納不致漫溢爲災臣現飭工次員弁將口門趕緊收束以免掣動大溜仍依照潘季馴斬輔減水成法酌留口門五十丈暫緩堵塞藉資宣洩俾下游水勢稍殺防守較易爲力此處將來應否卽留作減水壩抑或仍須堵塞應俟霜清後查看情形再行請旨辦理此次漫決各處據報人口均無損傷惟下游南岸郭家寨之水仍行灌入小清河河小難容漫衍彌廣而章邱齊東鄒平高苑博興樂安等縣均係積年被水之區民情實形困苦臣現飭司道遴委員紳攜帶饘餅蘆蓆分行散放一面委員查明被災戶口設法賑卹急賑由官紳捐辦普賑銀兩擬由藩庫酌量籌撥趕速散放至此次郭家寨決口因毛家店被掘毗連浸灌未能加修所致雖與防守不力者有間究屬未能周密咎有應得應請旨將防守該段之都司沙明亮摘去頂戴以示懲儆章邱縣知縣喬有年已因毛家店辦料遲緩革職留任應免置議 附片奏再正在封摺間接據潘駿文稟稱毛家店大隄掘口連日督同在事員弁設法進占至第四占金門收窄水勢較緊前面墊陷數尺隨經廂壓穩固一面渡纜下料晝夜搶築至二十九日辰刻合龍等情除飭趕築後將善後事宜妥爲布置外理合附片具陳 奉 上諭（六月十一日准兵部火票遞到軍機大臣字寄初六日奉 上諭）陳士杰奏伏汛盛漲

隄埝漫決分別籌辦情形暨毛家店大隄決口合龍日期各摺片覽奏均悉本年伏汛山東黃河盛漲毛家店上下游各民埝先後被水沖決堰頭鎮楊家莊民埝現均堵合惟郭家寨口門刷寬已近百丈一時暫難施工趙家莊民埝亦刷開七十餘丈該撫現擬將郭家寨口門盤住壩頭不使再行沖刷並飭在工員弁將趙家莊口門趕緊收束參酌成法分流入徒駭河藉資宣洩自係因勢變通卽著陳士杰妥爲辦理治河本宜疏堵兼籌東省黃水頻年爲患民不聊生但使水有所歸俾免泛溢正不必拘泥成見專以堵築爲事所有現在酌留口門將來應否改爲減水壩著俟霜清後查看情形奏明辦理此次被水災區該撫務當妥爲賑撫毋任流離失所所需銀兩卽由該省藩庫籌撥其疏防之都司沙明亮著摘去頂戴以示懲儆至毛家店決口雖已合龍仍著趕築後戍並將善後事宜妥爲布置將此由四百里諭令知之山東河工成案

是日陳士杰奏爲黃河上游光緒十年動用防汛經費照例造冊報銷事竊照東省黃河上游賈莊一帶光緒十年共用防汛經費銀八萬五千兩前經臣附片奏報下游河工自東阿縣起至利津鐵門關海口止兩岸一千餘里上年新築長隄加修民埝以資保衛當大工告成之際經臣核算長隄工需約可節省銀十八萬兩奏請作爲防汛經費在案查上年隄係新築土性鬆浮處處均關緊要五月間齊東蕭家莊歷城霍家溜等處相繼漫決隄身內外被淹一片汪洋尤屬危險萬分當經雇募夫勇不惜重價採辦物料分別廂堵防護以保完善之區核計自五月起至年底止辦理防汛一切共用實銀十七萬七千三百一十七兩零（錢分釐略下同）下存銀二千六百八十二兩零又扣存勇夫口糧小建銀

六百兩二共存銀三千二百八十二兩零應請歸入本年防汛項下事竣另行開報至陶城埠黃運口門防護埽壩各工上年由藩司發銀一千二百兩據東昌府知府程繩武稟報全數動用尙不敷銀四百五十六兩零已由該府籌墊應免給還山東河工成案

是日陳士杰奏再黃河下游自東阿縣起至利津縣止兩岸新築長隄格隄等工佔壓民間地畝前經臣奏定章程每畝發給地價制錢八千文以示體恤東阿平陰二縣隄底均寬五丈其餘底寬八丈興工之際印委各員以地勢高下不等間有築寬至八丈餘及九丈十丈者亦有不及八丈者其臨河一面並留二丈空地以備栽柳加培之用業經逐一丈量將地價支發清楚

山東河工成案

是日陳士杰奏再大清河河身淺窄本難容納黃水加以連年積淤水落時河岸祇餘三四尺民埵逼近河干與水爭地一經盛漲處處皆險防不勝防沿河百姓平時既未肯加培臨緊又復各顧身家專恃勇夫搶護沿河兩岸一千數百里實有鞭長莫及之勢惟兩岸生靈皆爲朝廷赤子臣常督飭藩臬文設法搶護能保守一處便少一處被災藉以稍紓庠懷至於意外險工堵築經費應歸另案辦理臣前於防汛章程內奏明在案此次籌堵毛家店掘口約計需銀二萬餘兩又堰頭鎮及楊家莊兩處民埵堵合共用銀一萬三千餘兩現在均於防汛經費及修補大隄兩項內開銷將來防守銀兩能否敷用容臣隨時察看情形再行奏明辦理山東河工成案

是日陳士杰奏再黃河南北兩岸新築長隄前經臣酌議防汛章程按三里建堡房一座堡每設防兵五名並另募勇丁二千五百名分段駐守以備三汛搶險之用奏奉部覆行令照辦在案嗣據總理河

防局務前按察使潘駿文詳稱大隄袤延千里原建堡房二百九十座共設防兵及陸續募勇夫約計三千五六百名霜清後以次裁減尙存不少而每弁帶勇不過一二百名一縣或至兩弁夫散工長未免不相聯屬且約束不如營伍之嚴整遇有險工搶護恐難得力該前司體察情形量爲變通請本年改募八營委熟悉河工之向帶精健前營副將景天榜精健後營參將馮義德各帶四營併其舊部共成十營分駐上下兩游上游爲河定五營下游爲河成五營派定段落飭令各司其事新募之勇每營五百人勇六夫四以三百名爲定額桃伏兩汛期內每次各增夫百名霜清及凌汛後遞減百名以期撙節應需口糧除精健兩營正勇向在善後局支領外有分次添夫及新募八營之餉均歸防汛經費內發給營官薪水公費以及幫帶哨官字識伍什長等項口分悉照善後局章程辦理馬勇長夫車價名目防河與剿賊不同卽行全數裁汰以昭核實又利捷潯河水師各船分派上下游隨時協助兼運料物其口糧有歸善後局支發者有由河防局給領者亦仍照舊辦理原建堡房於增培大隄時業經拆卸現在已告工竣擬按二里建堡房一座爲弁勇棲息之區每四座內修寬大房一間以備存儲繩索所需建造價值除用拆存木料下短若干另行核發等情懇請具奏前來臣查河工防汛最關緊要辦理原貴詳慎以期搶修得力該前司所請裁撤堡兵改募營勇並定額數分別增裁俾弁勇層層約束聲息相通籌畫亦尙周妥核計用款與上年定章無甚出入自應准其照辦至按二里建一堡房係爲勇丁便於棲止起見較之原定三里一堡增費無多亦應照准業經臣批飭照辦現據詳報各營招募齊全均已一律到防除隨時嚴飭認修守外所有酌量變通防汛章程緣由謹附片陳明

七月十六日陳士杰奏再查壽張縣孫家馬頭楊家井一帶民埝原係民間自行修守數年前屢被漫溢均皆隨時澗復此次漫水較大恐難照前全行澗出需用工費應俟霜清後查看情形再行奏明辦理至長清之大碼頭民埝決口水勢尙不甚急將來堵築當不至十分爲難惟上游沿河民埝多被漫溢應行修補之處尙復不少臣當分別工程大小酌加津貼一律補完

山東河工成案

是日陳士杰奏爲秋汛大漲上隄埝漫決數處現在籌辦賑撫大概情形事竊臣前因伏汛緊急防河勇丁不敷分布適值海防解嚴當調回振字兩營濟字一營分段加防以期嚴密六月間屢次盛漲均皆搶護平穩嗣據前按察使潘駿文及各營縣稟稱六月二十八九七月初一二等日大雨如注連宵達旦平地水深四五尺不等而豫省咨報萬錦灘六月二十一至二十四日水漲一丈有餘六月二十八日已抵壽張縣境比時大清河水勢陡漲一丈二三尺該縣黃水向分兩道連年以來西道壅塞不通是以漕運改歸陶城埠新運河入口此次盛漲復將舊河衝開由孫家碼頭迤東直灌舊運河分爲兩股小股漫入壽張陽穀境內大股穿陶城埠新運河順大隄趨東阿平陰肥城直抵長清之趙王河該處大隄壓河而過本留口門洩水不意水勢過大遂行從此沖刷口門寬約十四五丈其水半由齊河境入徒駭河半由五龍潭出大清河此壽張縣孫家碼頭黃水漫入沖刷趙王河大隄之大概情形也又據報長清縣之大碼頭民埝七月初二日河水大漲風雨交加其時民埝內外皆水無從取土防汛弁勇搶護不及隨即刷開數十丈其水順隄而下至齊河仍由上年大隄掘口處所灌入徒駭此兩

處皆屬北岸均未損傷人口惟南岸長清縣之玉符河七月初一日四更時分山水暴漲沖開民埝直入大清河該處四五村莊民房多被沖倒黑夜趨避不及淹斃男婦大小五十餘口當經長清縣知縣蘇杰給錢打撈屍首掩埋所刷口門僅十四五丈水亦不深隨即堵合埝內積水現飭駐防弁勇設法疏消以救秋禾以上被水各縣民情均屬困苦現飭司派員先放饘餅蘆蓆一面查明被災戶口籌款辦理普賑伏查大清河地勢南高北低而徒駭河倍形窪下故北岸決口黃水必歸徒駭該處河身淤墊已久前次趙家莊決口黃水灌入已屬難以容納加以趙王河大碼頭兩處決口之水復行灌入兩岸居民受災更深現飭司委員馳往查勘分別受災輕重一體籌款賑撫統共戶口若干將來作何籌款擬與司道會商妥貼再行奏明辦理至壽張之孫家碼頭長清之大碼頭兩處民埝口門候水勢稍落卽飭潘駿文前往查明籌辦其趙王河大隄失事一段係長清縣知縣蘇杰所轄防守武弁係候補游擊戴守禮應請旨將蘇杰戴守禮革職仍分別留任留守以示懲儆而觀後效 奉 上諭（七月二十七日內閣奉上諭）陳士杰奏秋汛大漲上游隄埝漫決現籌賑撫情形一摺卽著陳士杰委員馳往查勘趕緊籌款將被災戶口分別賑撫一面將未經搶築各口迅速堵合毋稍延玩長清縣知縣蘇杰著革職留任候補游擊戴守禮著革職仍留防所以觀後效本年下游決口尙未堵合茲上游又多開決陳士杰督率無方實難辭咎著交部議處山東河工成案 尋吏部議上得旨山東巡撫陳士杰著照部議降三級留任不准抵銷清德宗實錄

是月乙卯（十九日）諭軍機大臣等已革山東布政使李元華前因修築隄工奏報不實業經戶部以